

Adschee Rüddessem

Omm vergangene Freidaach sinn die Schorsch, de Karl unn isch meddem Zuuch nooch Rüddessem gefahrn unn sinn gleich in die Drosselgass. Wie immer iss doo schwer ebbes los gewese unn doo sinn merr in oo vunn dene Wertschaffde enoi, in dene alleweil Musik unn Stimmung iss.

Mir hawwe noch e Plätzje gefunne, hawwe uns newer e paar Chinese onn enn Disch gehoggd unn hawwe Woi bestellt, ohne ze frooche, wasser kossde dut.

Omm Newedisch hott enn Weiwerclub gehoggd, unn obwohl die all in unserm Alder gewese sinn warn die gut druff unn hawwe alls mett dem Musiker gesunge. Unn als dess Lied vumm Holzmichel kumme iss, hawwe merr kräffdisch mettgesunge unn die Chinese aach.

In su Lokale duts joo aach e Donnsfläch gewwe unn uff dere hawwe schunn e paar alle Sorte Pärcher gedonnsd. Uff oomol hott de Musiker enn Dusch gespilld unn hott gerufe: Die nächste Viertelstunde Damenwahl!

Mir hawwe uns nix debei gedenkt unn hawwe grad die Woikadd studiert, doo stieht uff oomol e Fraa vunn dem Club onn unserm Disch, stumt de Schorsch unn seet: Darf ich bitten?

Was wolden de Schorsch onnersders mache, also isser uffgestonne unn hott donnse misse, mir hawwe emm zugeguggd unn hawwe geseh, dass er koon grüße Spass debei hadd.

Als de Schorsch noochem ersde Donns die Fraa stieh gelosse hott, isser onn de Disch zuriggkumme unn hott gesaad: Die Donnserie dut misch werklisch oostreng. Wenn widder oo kimmt ferrs Donnse, macht ihr dess emol.

Unn werklisch iss e onner Fraa kumme, awwer die wollt jetz meddem Karl donnse, der awwer hott gesaad, isch bin grad onn de Knie oberierd worrn, donnse Se doch mett dem doo, moim Kummbeer Honnes.

Also musst isch uffsteihe unn mett dere Fraa uff die Donnsfläch. Glaabderr, isch habb joo schunn e paar Jahr nimmi gedonnsd unn habb dere Fraa zwaamol su uff de Fuß getrete, dass gesaad hott: Dankeschön, Sie sollten mal einen Tanzkurs machen, unn hott misch entlosse.

Jetz hawwe mir alle drei omm Disch gesotze unn hawwe in unser Woiglas geguggd, doo seet de Schorsch: Wissder was, mir haue ab. Ess iss alles nimmi su wie frieher, mir bezahle jetz unn mache uns hoom.

Unn donn sinn merr onn de Bohnhof, hawwe e Verrdelstunn gewadd unn sinn donn iwwer Wissbade nooch Flerschem zurigg gefahrn.

Wie isch hoomkumme bin unn die Hausdier uffgeschlosse habb, war die Fraa rischdisch erschrocke: Ei wo kimmsden du her, iss ebbes bassierd?

Ja, habb isch ze Antwort gewwe, Ihr Weibslait seid joo noch raffinierter als mir Menner. Mir hawwe gedenkt, mir hädde eich mett dem Laacherfeiersche uff de Kelb eroigeleeschd, dass merr widder mol nooch Rüddessem fahrn derrfe, awwer ihr habbt genau gewissd, dass mir uns dort nimmi wohlfühle dun. Mir hawwe jetz die Nas voll unn dess iss werklisch ess letzde Mol gewese, dass mir drei doohie fahrn. Dess iss nix mieh ferr uns. Adschee Rüddessem, adschee Drosselgass.

Unn, seet die Fraa, was wolderrn demnächst mache? Dracheboot fahrn?

Heer merr uff, saach isch, naa, mett eich in die Straußwertschafft gieh.

Eiern Honnes